

Illunut sanaqataaffiusunut taarsigassarsiat pillugit Inatsisartut inatsisaata allanngortinneqarnera pillugu Inatsisartut inatsisaat (Illunut sanaqataaffiusunut kommunimit taarsigassarsiat, illunillu sanaqataaffiusunik il.il. aserfallatsaaliuinissamut, nutarterinissamullu taarsigassarsiat tapiissutillu)

§ 1

Illunut sanaqataaffiusunut taarsigassarsiat pillugit Inatsisartut inatsisaat nr. 28, 3. december 2018-imeersumi tulliuttut allannguutigineqassapput:

1. § 1-imi imm. 3-tut ilanngunneqassaaq:

” Imm. 3. Sumiiffinni nunalerinermut atugassiaasuni illunik sanaqataaffiusunik sanaartornissamut, pissarsinissamulluunniit taarsigassarsisitsisoqarsinnaavoq, illu sanaqataaffiusoq ukunannga najugaqarfiussappat:

- 1) nunalerisinnaanermut akuersissummik pigisaqartumit, imaluunniit
- 2) inunnit ingerlatsinermik isumaginnittunit.”

2. § 7, imm. 3 ima oqaasertalerneqassaaq:

” Imm. 3. Kommunalbestyrelsi taamaallaat illunik sanaqataaffiusunik qanoq ittuunerinik akuerisanik sananermut pissarsinermulluunniit taarsigassarsisitsinnaavoq, tak. § 35. Qanoq ittuuneranik akuerisaasumi sanaartoqataasumit ikiortinnermut aalajangersagaq malillugu taarsigassarsisup ikiortinnissaa, taarsigassarsisitsinissami piumasaqaataavoq.”

3. § 8 ima oqaasertalerneqassaaq:

” § 8. Kommunalbestyrelsi § 7, imm. 1 malillugu illumik nutaamik sanaqateqarnermi ikkussugassat pisanerq naaportorlugu aaqqissuunneqarsimasunik sumiiffimmilu ikkussugassatut tunniunneqarsimasunik pissarsinermut aningaasartuutitut uppersarsarneqarsimasunut taarsigassarsisitsinnaavoq.

Imm. 2. Kommunalbestyrelsi § 7, imm. 2 malillugu illuni sanaqataaffiusuni pioreersuni sulii naammassillugu sanaartorneqanngitsuni sumiiffimmi saniatigut atortussanik pisariaqartunik tunniunneqarsimasunik

pissarsinermut aningaasartuutitut uppersarsarneqarsimasunut taarsigassarsititsisinnaavoq.

Imm. 3. Kommunalbestyrelsi § 7 malillugu sanaartorfigissaanermut, toqqavissap pilersaarusiorderanut sanaartorneranullu, sanaartoqataasumit ikiortinnermut aamma ilitsersuisumit ikiortinnermut, innaallagissap, erngup imaluunniit kiassarnerup aqutaasa ikkussornerinut kiisalu innaallagissap erngullu aqutaannut, kuuffissuarnullu attavilernissamut pisortat piumasaqarnerinut aningaasartuutitut uppersarsarneqarsimasunut taarsigassarsititsisinnaavoq.

Imm. 4. Piffissaliussat, illunullu sanaqataaffiusunut taarsigassarsitinneqarnissamik qinnuteqartunut kommunit ikiorsiisarnerat pillugit, Naalakkersuisut paasissutissanik ilassutaasussanik piniartarnek pillugu maleruagassanik aalajangersaasinnaapput.”

4. § 9 ima oqaasertalerneqassaaq:

” **§ 9.** § 7 malillugu kommunalbestyrelsip taarsigassarsiissutigisai, tak. § 8, ukiuni 20-ni amerlaqatigiinnik akilersugassanngorlugit taarsigassarsiissutigineqassapput. Nationalbankip erniaritittagai 3%-pointimik ilallugit taarsigassarsiissutit ernialersorneqassapput. Illup sanaqataaffiusup atulernissaanut akuersissutip ulluanit erniaq aalajangersarneqassaaq, taarsigassarsiallu ukiut taarsersorneqarfissaanni atuulluni.

Imm. 2. Taarsigassarsiissutit ernialersorneqassapput, qaammatillu tamaasa aalajangersimasumik akiliuteqartarnikkut akilersorneqassallutik, qaammammut qaangiuttumut qaammatit aallartinnerini ullormi siullermi, taamaattoq tak. imm. 3.

Imm. 3. Taarsigassarsianut siullermeertumik akiliutigineqartussaq, illumut sanaqataaffiusumut atulernissamik akuersissutip tunniunneranit ukiumi tulluuttumi februaarip aallaqqaataani siullermeertumik akilerneqassaaq.”

5. § 10 ima oqaasertalerneqassaaq:

” **§ 10.** Taarsigassarsisup, taassumalu inoqutaasa piffissami pineqartumi isertitaat tamarmiusut ukiut tamaasa januaarip aallaqqaataani naatsorsorneqartut tunngavigalugit, qaammatini tulluuttuni aqqaneq-marluusuni qaammammut akiliutigineqartartussaq, tak. § 9, imm. 2, naatsorsorneqassaaq. Siullermeertumik illumut sanaqataaffiusumut atulernissamik akuersissutip tunniunneranit ukiumi tulluuttumi januaarip aallaqqaataani.

Imm. 2. Taarsigassarsisup, taassumalu inoqutaasa piffissami pineqartumi isertitai tamarmiusut 300.000 koruunit sinnersimatillugit, taamaattoq tak. imm. 1, isertitaasa 35 %-iisa nalinganik ukiumut tamarmiusumik akiliutissat ilaannik taarsigassarsisoq akiliuteqassaaq, taamaattoq annerpaamik ukiumut tamarmiusumik akiliutissaq. Ukiumut tamarmiusumik akiliutissaq taarsigassarsisumit akilerneqanngitsoq nalikillilerneqassaaq. ”

6. § 10 kingorna ilanngunneqassaaq:

” **§ 10 a.** Kommunalbestyrelsimit taarsigassarsiat § 7 malillugu aningaasartuutit uppersarsarneqartut tamarmiusut 100 procentii tikillugit annertussuseqarsinnaapput, tak. § 8, nammineq akiliutit ilanngaatilugit, tak. imm. 2.

Imm. 2. § 7 malillugu taarsigassarsitinneqarnissamik siumut neriorsuuteqarnissami, tak. § 8, qinnuteqartup 25.000 koruuninik nammineerluni akiliutissaminik kommunalbestyrelsimut akiliuteqarnissaa piumasaqaataavoq. Taarsigassarsitinneqarnissamik siumut neriorsuummik

qinnuteqartup akuersinera ilutigalugu, nammineq akiliutissat kommunalbestyrelsimut akiliutigineqassapput.

§ 10 b. Inatsisartut inatsisaat manna naapertorlugu illunut sanaqataaffiusunut taarsigassarsiarititanut akilersuutit akilerneqarsimasut, illunik sanaqataaffiusunik pilersaarutaasumik aserfallatsaaliuinissamut, nutarternissamullu kommunip taarsigassarsiissutissatut imaluunniit tapiissutissatut agguagassaanut nuunneqassapput.

§ 10 c. Illut sanaqataaffiusut aningaasalersorneqarnissaat pillugu Inatsisartut inatsisaat manna imaluunniit siusinnerusukkut inatsit naapertorlugu illut sanaqataaffiusut taarsigassarsiffigineqarsimallutik taarsersugassartai sulit taarsersorneqartut pilersaarutaasumik aserfallatsaaliornissaannut, nutarternissaannullu kommunalbestyrelsi taarsigassarsisitsisinnaavoq imaluunniit tapiissuteqarsinnaavoq.

Imm. 2. Taarsigassarsisitsinissamik siumut neriorsuisoqartinnagu pituttuisumik sanaartornissamut isumaqatigiissuteqarfioersimangitsunut imaluunniit sanaartornernut aallartinneqareersimangitsunut sulianut, tunniussanullu taamaallaat taarsigassarsisitsisoqarsinnaavoq imaluunniit tapiissuteqartoqarsinnaavoq.

Imm. 3. Kommunalbestyrelsi imm. 1 malillugu taarsigassarsisitsisimatilluni, inissianik aserfallatsaaliuinissamut nutarterinissamullu pisortat ikiorsiissuteqartarnerat, tapiissuteqartarnerat imaluunniit aningaasalersuisarnerat pillugit inatsit alla malillugu ilutigisaanik taarsigassarsisitsisinnaangilaq imaluunniit tapiissuteqarsinnaangilaq.

Imm. 4. Suliat suliarineqarsimaneritut imaluunniit tunniussassat tunniunneqarsimaneritut uppersaammik takutitsinikkut taarsigassarsiat imaluunniit tapiissutit sulisartumut pineqartumut akilerneqassapput.

Imm. 5. Illunik sanaqataaffiusunik pilersaarutaasumik aserfallatsaaliuinissamut, nutarterinissamullu kommunalbestyrelsip taarsigassarsisitsinissaanut imaluunniit tapiissuteqarnissaanut Naalakkersuisut malittarisassanik aalajangersaasinnaapput

§ 10 d. Taarsigassarsitinneqartup, taassumalu inoqutaasa piffissami tapiissutit aningaasaliiffigineqarnerini piffissami pineqartumi isertitai tamarmiusut 300.000 koruunit sinnersimangippagit aatsaat tapiissuteqartoqarsinnaavoq.

§ 10 e. 100.000 koruunit tikillugit taarsigassarsisitsisoqarsinnaavoq. Taarsigassarsiaritinneqartut tamakkerlugit akilerneqarsimatillugit, taarsigassarsitinneqarnissamik qinnuteqaqqittoqarsinnaavoq. Taarsigassarsiat ukiuni 15-ini akilersugassanngorlugit amerlaqatigiinnik akilersugassaallutik taarsigassarsiissutigineqassapput. Nationalbankip erniaritittagai 3%-pointimik ilallugit taarsigassarsiissutit ernialersorneqassapput. Taarsigassarsiat ullormi tunniunneqarfisa ulluanit erniaq aalajangersarneqassaaq.”

7. § 11 ima oqaasertalerneqassaaq:

” **§ 11.** § 7 malillugu kommunalbestyrelsimit taarsigassarsiat, tak. § 8, § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut taarsigassarsisup

nammineerluni aningaasalersorpagit, tak. § 8, aningaasalersorsimaneranullu uppersaammik takutitsineratigut aatsaat taarsigassarsiissutigisinnaapput.

Imm. 2. § 7 malillugu kommunalbestyrelsip taarsigassarsisitsinissamut siumut neriorsuutaanut, tak. § 8, piunasaqaataasinnaavoq, § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut aningaasalersorneqarnissaannut taarsigassarsisup kommunalbestyrelsimut aningaaserivimmi qularnaveeqqusiinissaa, tak. § 8."

8. § 12 ima oqaasertalerneqassaaq:

" § 12. § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut aningaasalersorneqarnissaannut taarsigassarsisup taarsigassarsiarisinnaasai, tak. § 8, illu sanaqataaffusoq qularnaveeqqusiullugu qulakkeerneqarsinnaapput.

Imm. 2. Kommunalebestyrelsimut taarsigassarsiat illumi sanaqataaffusumi qularnaveeqqusiisoqarneratigut isumannaarneqassapput.

Imm. 3. § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutinut tamarmiusunut taarsigassarsisup aningaasalersuinissaanut, illu sanaqataaffusoq qularnaveeqqusiullugu taarsigassarsiissutigineqarsimasut, kommunalebestyrelsimut taarsigassarsiat ataqqissavaat, tak. § 8.

Imm. 4. Kommunalebestyrelsip taarsigassarsiarititai illumi sanaqataaffusumi qaffatsinneqarlutik qularnaveeqqutaassapput."

9. § 15, imm. 4 ima oqaasertalerneqassaaq:

" Imm. 4. Illumut sanaqataaffusumut piginnittussaataaneq taarsigassarsitinneqartumut tunniunneqarsinnaanngippat, taarsigassarsisup nammineerluni akiliutigisai 25.000 koruuniusut, illumillu sanaqataaffusumik sanaartornermi imaluunniit tigusinermi taarsigassarsiffiusinnaallutik aningaasartuutini tamarmiusuni taarsigassarsisup aningaasartuutigisimasai, § 7 malillugu taarsigassarsiatigut aningaasalersorneqanngitsut, kommunalebestyrelsip utertissavai, tak. § 8."

10. § 23-mi, imm. 1-imi nr. 1-ip siorna normu 1-itut nutaatut ilanngunneqassaaq:

"1) Taarsigassarsiat erniaat akilersuutillu akilernerneqanngippata, illummilu qularnaveeqqusiussaqaarluni taarsigassarsinermi allagartaq malillugu ernianik akilersuutinillu akilersuisarneq pillugu malittarisassat naapertorlugit ernianut, akilersuutinullu akiitsut piffissarititaasup qaangiutinnginnerani taarsigassarsisup akilersimanngippagit, tak. lov for Grønland om pant (qularnaveeqqusiineq pillugu Kalaallit Nunaannut inatsit)."

Taassuma kingorna nr. 1-8, 2-9-nngussapput.

11. § 27-p kingorna qulequttap *Taarsigassarsinissamut qinnuteqarneq*-rup ataani ilanngunneqassaaq:

" § 27 a. Illumik sanaqataaffusumik nutaamik sanaartornissamut imaluunniit pissarsinissamut taarsigassarsitinneqarnissamut kommunalebestyrelsi tamanut ammasumik qinnuteqaqqusissaaq. Tamanut ammasumik qinnuteqaqqusineq marsip aallaqqaataanut piffissalerlugu, ukiumut ataasiartumik januaarimi pisassaaq. Ilassutitut aningaasaliineri, qinnuteqarnissamut naammaginartumik piffissaliilluni tamanut

ammasumik nutaamik qinnuteqaqqusisoqassaaq.

Imm. 2. Qinnuteqaatit tiguneqartut suliarineqarnerini, tak. imm. 1, akuerisaallutik qinnuteqartut illutaarnissaminnut pisariaqartitsinerpaasut, inissaminnillu periarfissatut tunineqarnissaminnut periarfissaqanngitsut salliunneqassapput.

Imm. 3. Qinnuteqaatit tiguneqarsimasut suliarineqareerlutik aalajangiiffigineqarnerisa kingorna aningaasaliissutininik atunngitsuugaqassappat, tak. imm. 1, kingusinnerusukkut qinnuteqaatit tighneri malillugit qinnuteqaatit suliarineqassapput.

Imm. 4. Qinnuteqartut illutaarnissaminnut pisariaqartitsinerisa, periarfissatullu inissiamik pilersornissaminnut periarfissaasa imm. 2 malillugu nalilersorneqarnissaanni kommunalbestyrelsip suut eqqarsaatigisassatut pingaartissinnaanerai, pingaartitassaalu pillugit Naalakkersuisut aalajangersaasinnaapput.”

12. § 28, imm. 1 ima oqaasertalerneqassaaq:

” Illumik sanaqataaffiusumik sanaartornissamut imaluunniit pissarsinissamut taarsigassarsitinneqarnissamik qinnuteqaat allaganngorlugu kommunalbestyrelsimut nassiunneqassaaq.”

13. § 32 ima oqaasertalerneqassaaq:

” **§ 32.** Missiliummik, ingerlatsinermilu missingersuummik qinnuteqartumit akuerisassanngortitanik kommunalbestyrelsi saqqummiussissaaq. Matuma kingorna nammineq akiliutissat akilerneqarsimanerat, tak. § 10 a, imm. 2, aningaaserivimmit qularnaveeqqusiussaasinnaasoq, tak. § 11, imm. 2 aamma akiliutaasinnaasut akilerneqarsimanerat, tak. § 25, apeqqutaatillugit taarsigassarsisitsinissamut siumut neriorsuummik kommunalbestyrelsi qinnuteqartumut nalunaaruteqassaaq.”

14. Kapitali 4-mi § 32-p kingorna ilanngunneqassaaq:

” **§ 32 a.** Ukiumut naatsorsuusiornermi kommunalbestyrelsip paasissutissat ukua ilanngutissavai:

- 1) Ukiumi naatsorsuusiornissamut taarsigassarsisitsinissamik siumut neriorsuutit amerlassusaat.
- 2) Taarsigassarsisitsinissamik siumut neriorsuutit atuuttut amerlassusaat.
- 3) Taarsigassarsisitsinissamik siumut neriorsuutit ukiumi naatsorsuusiornissamut naammassimasut amerlassusaat.
- 4) Ukiumi naatsorsuusiornissamut aningaasaliissutininik tamarmiusunik atuineq.

Imm. 2. Paasissutissat sumiiffinnut agguataarneqassapput.

Imm. 3. Kommunalestyrelsip ukiumut naatsorsuutininik saqqummiussinerata kingusinnerpaamik ilutigisaanik paasissutissat Naalakkersuisunut nassiunneqassapput.”

15. § 33, imm. 2 ima oqaasertalerneqassaaq:

” *Imm. 2.* Sanaartorfigissaanermut, toqqavissap pilersaarusiornernut sanaartorneranullu, illumut suliarineqanngitsumut aamma innaallagissamut, imermut, kiassarnermullu ikkussuinnermut kiisalu ilitersuisumit ikiorserneqarnermut taarsigassarsiissutit, suliat suliarineqarsimanerinut uppersaammik takutitsinikkut sulisartumut pineqartumut akilerneqassapput.”

16. § 35, imm. 1 ima oqaasertalerneqassaaq:

” Ukiumik ataatsimik sivisussusilimmik atuuttussamik illup sanaqataaffiusup qanoq ittuuneranik Naalakkersuisut akuersissuteqartassapput. Ilusilersorneqarnissaanut, atorineqarnissaanut, teknikikkullu atortulersuutitut kiisalu sanaqateqarnissamut Naalakkersuisut piumasaqaasiorsinnaapput.”

§ 2

Inatsisartut inatsisaat manna ulloq 1. Juni 2024 atuutilissaaq.

Imm. 2. Inatsisartut inatsisaata matumap atuutilernissaa sioqqullugu illunut sanaqataaffiusunut taarsigassarsiarititat, taarsigassarsitsinissamillu siumut neriorsuutit piumasaqaataat allanngortinnagit ingerlaqqiinnassapput.

Imm. 3. Inatsisartut inatsisaata atuutilernissaa sioqqullugu malittarisassat atuuttut naapertorlugit qinnuteqartut taarsigassarsitinneqarnissaminnik siumut neriorsorneqarsimasut, kommunalbestyrelsimut qinnuteqarnermikkut inatsisartut inatsisaanni matumani malittarisassat naapertorlugit taarsigassarsitinneqarnissaminnik nutaatut siumut neriorsorneqarsinnaapput.

Imm. 4. Taarsigassarsitinneqarnissamik siumut neriorsuummik nutaamik tunineqarnissamik qinnuteqaat kommunalbestyrelsip itigartissinnaavaa, tak. imm. 3, taarsigassarsitinneqarnissamik siumut neriorsuut tunngavigalugu inatsisitigut pituttorsimasumik aalajangersaasoqarsimappat imaluunniit nutaamik siumut neriorsuuteqarnissamut atatillugu aningaasartuuteqarnerunissamut aningaasaliissutitigut matussutissaqanngippat.

Kalaallit Nunaanni Namminersorlutik Oqartussat, ulloq 16. maaji 2024

Múte Bourup Egede

Naalakkersuisut Siulittaasuut

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

